

Ilinniarnertuunngorniartarneq pillugu Inatsisartut inatsisaata allanngortinnera pillugu Inatsisartut inatsisaat nr. 16, 27. november 2020-meersoq

(Ilinniartussanik tiguisarneq pillugu suleriaatsimik allannguneq, semesterimut siullermut tunngaviumik ingerlatsinermik allannguneq, ilinniartitsisunut siunnersuisoqatigiit pillugit malittarisassat nutaat il.il.)

§ 1

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-meersumi, Inatsisartut inatsisaat nr. 31, 9. december 2015-imeersoq aqputigalugu allanngortinneqartumi, uku allanngortinneqartut:

1. § 1, *imm. 1-imi, oqaaseqatigiit aappaat* atorunnaarsippaa.

2. § 5, *imm. 1, ima oqaasertaqarpoq:*

" Naalackersuisut ilinniarnertuunngorniarnermut ilinniartunullu inissiaqarnikkut inissat ima amerlatigisut qularnaassavaat, qinnuteqartut § 8, *imm. 1* aamma 2 naapertorlugit ilinniartunngornissamut piunasaqaatinik eqquutsisut tamarmik ilinniartunngorsinnaatillugillu ilinniakkaminnik naammassinnissinnaatillugit. Aammattaaq Naalackersuisut anguniassavaat ilinniarnertuunngorniartarneq ilinniartunullu inissiat ima amerlatiginissaat, qinnuteqartut ilinniartunngorniartarneq misilitsinnermi angusisut tamarmik, tak. § 9, *imm. 1*, aamma qinnuteqartut immikkut akuerisaallutik ilinniartunngortinneqarumasut, ilinniartunngortinneqarsinnaallutik ilinniarnertuunngorniartarneq ilinniagaq naammassisinnaallugu."

3. § 8, *imm. 1, nr. 3*, imatut oqaasertalerneqarpoq:

"3) Greenlandic Grading System-skala naapertorlugu 10. klassimi **inaarutaasumik** angusimasanut karakterini tamani minnerpaamik karakteri E anguneqarsimappat."

4. § 8, *imm. 2*, imatut oqaasertalerneqarpoq:

" *Imm. 2*. Rektori *imm. 1-imi* piunasaqaatinik sanioqutitsinissamut akuersisinnaavoq, qinnuteqartup misilitsinnerit imaluunniit killiffimmi karakterit ikittunnguit ilaanni E ataassimappagu, rektorillu nalilerpagu qinnuteqartup ataatsimut piginnaasai ilinniarnertuunngorniartarneq ilinniakkap naammassinissaanut naammattut."

5. § 9 imatut oqaasertalerneqarpoq:

" § 9. Qinnuteqartut § 8, *imm. 1* imaluunniit 2 naapertorlugu ilinniartussatut tiguneqanngitsut Naalackersuisunit neqeroorfigineqassapput nalilersorneqarlutik tigusaanissamut misilitsillutik. Misilitsinnerup siunertaraa, qinnuteqartup ilinniartitsinermik malinnaanissamut ilinniakkallu naammassinissaanut **naammattumik** ilinniakkatigut ilisimasaqassutsimik takutitsinissaminut periarfissinnissaa.

Imm. 2. Inissaq pissutigalugu qinnuteqartut ilinniartunngorniarluni misilitsinnermi angusisut inissaqartinninneri pequtigalugit tiguneqarsinnaanngippata, rektorip aalajangissavaa qinnuteqartut kikkut ilinniartunngortinneqassanersut. Rektorip taamatut aalangiinnermini qinnuteqartup ilinniarnertuunngorniarnerluni ilinniakkamik naammassinninnissamut periarfissai ataatsimoortumik nalilersussavai. Qinnuteqartut ilinniarnertuunngorniarfimmi ilinniartunngortinneqanngitsut, inissaqassuseq apeqqutaatillugu ilinniarnertuunngorniarfimmi allami ilinnialernissaannik utaqqisunulluunniit allatsinnissaminnut neqeroorfigineqassapput.”

6. Inatsimmi sumi tamani ”tunngaviusumik ingerlatsineq” ima allanngortinneqassaaq: ”semesteri siulleq”.

7. § 11 imatut oqaasertalerneqarpoq:

” § 11. Qinnuteqartut ilinniarfiit aallartikkusutaminnik kissaatimi tullerriaarneri pingaarnerniit normulerlugit allassavaat.

Imm. 2. Qinnuteqartut ilinniarnertuunngorniarfimmi kommunimi qinnuteqarnermik nalaani aalajangersimasumik najugaqarfigisaminniittumi (kommuni angerlarsimaffik) ilinniartunngussapput imaluunniit ilinniarnertuunngorniarfimmi sammivik kissaatigisaminnik neqeroorutilimmi ilinniartunngortinneqassapput kommunip angerlarsimaffiup neqeroorutaaniinngippat ilinniarnertuunngorniarfimmi allami, taamaattoq tak. imm. 3-5.

Imm. 3. Naalackersuisut aalajangersinnaavaat qinnuteqartoq ilinniarnertuunngorniarfimmi imm. 2-mi, pineqartuunngitsumi ilinniarnertuunngorniarfittut aallartissinnaasoq, inissaqarnikkut imaluunniit suliamut atatillugu inuttulluunniit pissutsit immikkut ittut tamanna pisariaqartilerpassuk.

Imm. 4. Ilinniarnertuunngorniarfimmi aalajangersimasumi ilinniakkatut sammivimmut aalajangersimasumut ilinniarfiup inissaqartitaaniit amerlanerulaartunik qinnuteqartoqarpat, Naalackersuisut killilimmik amerlanerusunik ilinniartunngortitsisinnaaneq akuersissutigisinnaavaat. Ilinniarnertuunngorniarfimmi aalajangersimasumi ilinniakkatut sammivimmut aalajangersimasumut ilinniarfiup inissaqartitaanit amerlaneroqisunik qinnuteqartoqarpat, rektorip qinnuteqartut pisinnaasaannik ilinnialerumallutillu pissutigisaannik ataatsimoortumik nalileereernermit aalajangissavaa, qinnuteqartut kikkut ilinniartunngortinneqassanersut. Qinnuteqartut ilinniartunngortinneqanngitsut pingaarnerniit tullerriaarinnermini tulluutsitartik naapertorlugu ilinniartunngortinneqassapput, malittarisassat maani nalunaarsorneqartut naapertorlugit.

Imm. 5. Naalackersuisut qinnuteqartut illoqarfinit, nunaqarfinit imaluunniit sumiiffinit aalajangersimasumik killilerneqarsimasuneersut ilinniarnertuunngorniarfimit tiguneqarnissaat eqqarsaatigalugu kommunimi allami angerlarsimaffeqartutut isigineqarsinnaanerit pillugit malittarisassanik aalajangersaasinaapput.”

8. § 15, *imm. 1-imi oqaaseqatigiit aappaat* atorunnaarpoq.

9. § 16, *imm. 2*, imatut oqaasertalerneqassaaq:

” *Imm. 2.* Ukiuni pingasuni ilinniakkap ataatsimut katillugit tiimit 2225-2725-ussapput ilinniartullu **ilinniakkaminik** sammivimmik immikkullu toqqagassanik toqqaasimanera apeqqaalluni ukiuni marlunni ilinniarnerni tiimit 1500-1825-ussallutik.”

10. § 16, imm. 4 nutaatut ilanngunneqassaaq:

” *Imm. 4.* Imm. 2-mi taaneqartunit sivisunermik sivikinnermilluunniit ilinniarfiusuni atuartitsiviusut tiimit qassiussanersut malittarisassanik Naalackersuisut aalajangersaasinnaapput.”

11. § 19 atorunnaarsinneqarpoq.

12. § 20, imm. 2, imatut oqaasertalerneqassaaq:

“ *Imm. 2.* Naalackersuisut semesterimi siullermi pinngitsoorani sorliit atuartitsissutigineqartussat pillugit malittarisassanik aalajangersaasinnaapput.”

13. § 23 aamma § 28 atorunnaarsinneqarput.

14. § 65 ima oqaasertaqassapput:

” **§ 65.** Ilinniarnertuunngorniarfinni ataasiakkaani tamani ilinniartitsisut siunnersuisartoqatigiiliussapput, tassani inuttaassallutik rektori, immikkoortortani pisortat kiisalu ilinniartitsisut, ilinniarnertuunngorniarfimmi atuartitsisartut imaluunniit atuartitsinermut ilinniartitsinermulluunniit arlaatigut attuumassuteqartut. Ilinniartut siunnersuisartoqatigiivisa peqataatitaat ilinniartitsisut siunnersuisartoqatigiivisa ataatsimiinnerini malinnaasutut peqataasinnaavoq.

Imm. 2. Ilinniartitsisut siunnersuisoqatigiit rektorimut siunnersuisassapput.

Imm. 3. Ilinniartitsisunut siunnersuisoqatigiit ukiumut ikinnerpaamik sisamariarlutik ataatsimiittassapput. Ilinniartitsisut siunnersuisartoqatigiivisa namminneq suleriaasissartik aalajangissavaat. Inaarutaasumik suleriaasissaq rektorimit akuersissutigineqassaaq.

Imm. 4. Ilinniartitsisunut siunnersuisartoqatigiit apriilimi ukiut tamaasa siulittaasussaminnik qinersisassapput.

Imm. 5. Ilinniartitsisunut siunnersuisoqatigiinni apequtit sorliit qaqineqassanersut rektorip ilinniartitsisunullu siunnersuisoqatigiinni siulittaasorlu ataatsimoorlutik aalajangertassavaat.

Imm. 6. Ilinniartitsisut siunnersuisartoqatigiivini sulineq piffissamut ilinniartitsisup ilinniartitsiffianut ilaasutut naatsorsuunneqarpoq. Sulineq ima aaqqissuuneqassaaq, ilinniartitsisoq sapinngisamik annertunerpaamik ilinniartitsinermik pilersaarusiorkkamik ingerlatsisinnaatillugu.

Imm. 7. Naalackersuisut ilinniartitsisut siunnersuisartoqatigiivi pillugit malittarisassanik erseqqinnerusunik aalajangersaasinnaapput, tamatumunnga ilanngullugit ilinniartitsisut siunnersuisartoqatigiivinut qinersisarneq, siunnersuisartoqatigiit sulinerat piffissarlu atuuffiat.”

Inatsisartut inatsisaat ulloq 1. januar 2021 atortuulissaaq. Aalajangersakkat § 1, nr. 6, 8, 9, 10, 11 aamma 14 atortuulissapput ulloq 1. august 2021.

Namminersorlutik Oqartussat, ulloq 27. november 2020



Kim Kielsen